

TUARASCÁIL BHLIANTÚIL
2006



an bord um
chuntais dhíomhaoine
the dormant
accounts board

TUARASCÁIL BHLIANTÚIL
2006

CLÁR

Tuarascáil Chathaoirleach an Bhoird um Chuntais Dhíomhaoine chuig an Aire Gnóthaí Pobail, Tuaithe agus Gaeltachta de réir mar a cheanglaítear faoin Acht um Chuntais Dhíomhaoine (Leasú) 2005 agus faoin gCód Cleachtais um Rialú Comhlachtaí Stáit don tréimhse 4 Eanáir – 31 Nollaig 2006.

Réamhrá

Forléargas ar 2006

Príomhghníomhaíochtaí na bliana 2006

Aguisín A: - Caiteachas an Bhoird 2006

Aguisín B: - An Bord um Chuntais Dhíomhaoine
Tinreamh ag Cruinnithe Boird
Coiste Iniúchta an Bhoird

Aguisín C: - Liosta de Sholáthraithe Seirbhíse

Aguisín D: - Dearbhuithe an Chathaoirligh

**Aguisín E: - Ráiteas an Chathaoirligh maidir leis an gCóras Rialaithe
Inmheánaigh Airgeadais**

Tuarascáil Chathaoirleach an Bhoird um Chuntais Dhíomhaoine chuig an Aire Gnóthaí Pobail, Tuaithe agus Gaeltachta de réir mar a cheanglaítear faoin Acht um Chuntais Dhíomhaoine (Leasú) 2005 agus faoin gCód Cleachtais um Rialú Comhlachtaí Stáit

Don tréimhse 4 Eanáir – 31 Nollaig 2006

Réamhrá:

Ullmhaíodh an tuarascáil seo de réir Alt 10 den Chód Cleachtais um Rialú Comhlachtaí Stáit. Is Bord Stáit neamhthráchtála é an Bord um Chuntais Dhíomhaoine agus tá leagan amach agus ábhar na tuarascála seo curtha in oiriúint chun an seasamh sin a léiriú. Níl feidhmeanna feidhmiúcháin ar bith ag an mBord agus is aonán é chun polasaithe a leagan amach agus chun monatóireacht a dhéanamh ar pholasaithe, agus sin amháin. Ina theannta sin ceanglaíonn An tAcht um Chuntais Dhíomhaoine (Leasú) 2005 ar an mBord, ag tráth nach déanaí ná an 30ú Meitheamh gach bliain, tuairisc a thabhairt ar fheidhmiú a fheidhmeanna le linn na bliana airgeadais roimhe sin agus a áireamh sa tuarascáil:

- (a) sonraí faoi na costais agus na speansais a thabhaigh an Bord i bhfeidhmiú a fheidhmeanna faoin Acht seo,
- (b) sonraí faoi thorthaí athbhreithnithe agus measúnuithe faoi alt 31(1)(b) agus
- (c) aon fhaisnéis eile a shonródh an tAire

Ós rud é gurb í seo an chéad Tuarascáil de chuid an Bhoird um Chuntais Dhíomhaoine don tréimhse ó bunaíodh an Bord ar an 4^ú Eanáir 2006 go dtí an 31^ú Nollaig 2006 déantar athbhreithniú sa tuarascáil seo ar ghníomhaíochtaí an Bhoird óna bhunú, ar an dul chun cinn atá déanta maidir le forfheidhmiú a dhualgas agus a fheidhmeanna reachtúla agus tugtar cuntas ar ghníomhaíochtaí airgeadais. I dteannta na gceanglas reachtúil a bhaineann le tuairisciú a chomhlíontar in Aguisín A, leagtar amach sonraí faoi chomhaltaí an Bhoird, faoi thinreamh ag cruinnithe agus ag fochoistí an Bhoird in Aguisín B. Leagtar amach liosta de sholáthróirí seirbhíse in Aguisín C. Leagtar amach dearbhuithe an Chathaoirligh in Aguisín D agus leagtar amach Ráiteas an Chathaoirligh maidir leis an gCóras Rialaithe Inmheánaigh Airgeadais in Aguisín E.

Tá an Bord, agus mise mar Chathaoirleach, an-bhuíoch as an gcabhair a tháinig ón Roinn Gnóthaí Pobail, Tuaithe agus Gaeltachta agus as an obair a rinne an Rúnaireacht go héifeachtach gairmiúil chun tacú le hobair an Bhoird.

Michael Morley
Cathaoirleach

Forléargas ar 2006

Bunaíodh an Bord ar an 4ú Eanáir 2006 tar éis achtachán an Achta Um Chuntais Dhíomhaoine (Leasú) 2005.

Leagtar amach feidhmeanna an Bhoird in alt 31(1) den reachtaíocht seo agus is mar seo a leanas atá siad:

- (a) plean eisíocaíochta airgid faoi Chuid 6, a ullmhú agus a chur faoi bhráid an Aire, de réir Alt 42,
- (b) athbhreithniú agus measúnú a dhéanamh ó am go ham-
 - (i) ar a mhéid is a comhlíonadh na cuspóirí atá sonraithe sa phlean
 - (ii) ar éifeachtacht na straitéisí atá sonraithe sa Phlean, agus
 - (iii) ar phatrún agus ar thionchar na n-eisíocaíochtaí faoi Chuid 6, lena n-áirítear a fháil amach ar tharla gníomhaíochtaí nach mbeadh tarlaithe d'uireasa na n-eisíocaíochtaí sin.
- (c) tuarascálacha a chur faoi bhráid an Aire faoi alt 45(3).

Soláthraíonn an tAcht um Chuntais Dhíomhaoine, 2001, chomh maith leis an Acht um Polasaithe Árachais Saoil Neamhéilithe, 2003 agus an tAcht um Chuntais Dhíomhaoine (Leasú) 2005 creat chun na cuntais neamhéilithe in institiúidí creidmheasa (mar shampla bainc, cumainn foirgníochta agus An Post) agus na polasaithe árachais saoil neamhéilithe i ngnóthais árachais a riar. Is é príomhchuspóir na reachtaíochta sealbhóirí cuntas/polasaí a athcheangal lena gcistí in institiúidí creidmheasa/i ngnóthais árachais agus, maidir leis sin, ceanglaítear ar institiúidí/ar ghnóthais céimeanna a ghlacadh chun úinéirí cuntas díomhaoin agus polasaithe árachais saoil neamhéilithe a aithint agus teagmháil a dhéanamh leo.

Aistríonn na hinstitiúidí airgeadais/na ngnóthais árachais cuntais dhíomhaoine/polasaithe árachais saoil neamhéilithe, nach bhfuil athéilithe ag an sealbhóir bunaidh cuntais/polasaí nó ag a dtairbhíthe, gach bliain chuig Ciste na gCuntas Díomhaoin (an Ciste) arna bhainistiú ag Gníomhaireacht Bainistíochta an Chisteáin Náisiúnta. Déantar an t-aistriú airgid ar an mbonn go mbeidh ceart ráthaithe athéilimh ar a mhaoin/ar a maoin ag an úinéir tairbhiúil ag aon tráth sa todhchaí.

Tugadh isteach scéim le haghaidh eisíoc cistí nach móide go n-athéileofar iad, faoin reachtaíocht chomh maith. Ba é Bord Eisíocaíochtaí Chiste na gCuntas Díomhaoin a bhí freagrach i dtús báire as maoirseacht a dhéanamh ar eisíoc an airgid sin as an gCiste. Is é an Rialtas atá freagrach i láthair na huaire as cinntí maidir le heisíocaíochtaí de bhun achtú an Achta Um Chuntais Dhíomhaoine (Leasú) 2005. Is é ról an Bhoird um Chuntais Dhíomhaoine comhairle neamhspleách a thabhairt agus gníomhú mar bhreathmheastóir criticiúil maidir le cinntí an Rialtais. Ghlac an Bord um Chuntais Dhíomhaoine freagracht air féin chomh maith maidir leis na cinntí eisíocaíochta a rinne iarBhord Eisíocaíochta Chiste na gCuntas Díomhaoin.

Ba iad ullmhú an phlean eisíocaíochta agus na socrúithe praiticiúla ba ghá a chur i bhfeidhm i gcomhair fhorfheidhmiú an phlean príomhghníomhaíochtaí an Bhoird i rith na bliana 2006. Rinne an Bord obair shuntasach freisin chun a chinntiú gur

forbraíodh na struchtúir riachtanacha rialachais chorparáidigh agus gur cuireadh i bhfeidhm iad.

Príomhghníomhaíochtaí sa bhliain 2006:

1. Ceaduithe an iarBhoird a bhainistiú

Lean an Bord de bheith ag déanamh maoirseachta ar eisíocaíocht airgid as an gCiste, próiseas a thosaigh an t-iarBhord. Lean Pobal ag riar an chéad bhabhta maoinithe as cuntais dhíomhaoiné. Is é ról an Bhoird monatóireacht a dhéanamh ar eisíocaíochtaí, athruithe ar na tionscadail a fhaomhadh agus ceaduithe a chur as feidhm i gcás go roghnaíonn tionscadail gan leanúint ar aghaidh nó i gcás nach gcaitheann siad iomlán na suime a faomhadh.

Tá an Bord freagrach as an treoir a eisiúint ar Ghníomhaireacht Bainistíochta an Chisteáin Náisiúnta chun airgead as an gCiste a scaoileadh amach ar Pobal maidir le maoiniú Bhabhta 1.

2. Plean nua Eisíocaíochta a Fhorbairt

D'fhorbair an Bord Plean nua Eisíocaíochta a d'fhaomh an Rialtas ar an 27ú Iúil 2006 agus tá sé in úsáid anois mar pholasaí don dara babhta d'iarratais agus de cheaduithe tionscadail.

Sonraítear sa phlean na cuspóirí a bheidh le baint amach trí eisíocaíochtaí a dhéanamh as an gcuntas agus na straitéisí chun na cuspóirí sin a bhaint amach agus tá an plean ullmhaithe i bhfoirm agus i mbealach a ghabhann de réir treoirlínte agus teoracha ar bith a d'fhéadfadh an tAire a eisiúint.

Chinn an Bord sa Phlean, ag féachaint dá shainchúram reachtúil, gur cheart eisíocaíochtaí as an gCiste a dhíriú ar thionscadail nó ar chláir atá saincheaptha chun cabhrú le haon cheann de na trí chatagóir leathana seo a leanas de dhaoine:

- Iad siúd a bhíonn faoi mhíbhuntáiste eacnamaíoch agus sóisialta;
- Iad siúd a mbaineann míbhuntáiste oideachais leo;
- Daoine faoi mhíchumas.

Leagadh amach sa phlean go leithdhálfaí sprioc de 40% den mhaoiniú iomlán bliantúil ar an réimse a bhaineann le míbhuntáiste eacnamaíoch agus sóisialta agus go leithdhálfaí 25% ar a laghad ar gach ceann den dá chatagóir eile – míbhuntáiste oideachais agus daoine faoi mhíchumas.

Déanann an Roinn Gnóthaí Pobail, Tuaithe agus Gaeltachta, An Roinn Oideachais agus Eolaíochta agus an Roinn Sláinte agus Leanaí, faoi seach, iad sin a riar.

Le linn shaolré an Phlean, eisíocfar suim nach lú ná 50% de na leithdháiltí bliantúla i gcomhair míbhuntáiste eacnamaíoch agus sóisialta ar limistéir RAPID, CLÁR agus an Tascfhórsa Áitiúil Ar Dhrugaí.

Foilsíodh an Plean Eisíocaíochta i mí na Nollag 2006 agus scaipeadh 500 cóip.

Seoladh cóipeanna den tuarascáil chuig 63 Ionad Eolais do Shaoránaigh, 5 Bord Fiontair Contae, 109 Foras Oideachais, 3 Foras airgeadais, 20 Roinn Rialtais, 19 Leabharlann agus 6 Údarás Áitiúil, 166 Teachta Dála agus 60 Seanadóir. Seoladh an 49 cóip a bhí fágtha chuig Pobal. Tá cóip leictreonach den Phlean ar fáil

chomh maith ar shuíomh gréasáin na Roinne Gnóthaí Pobail, Tuaithe agus Gaeltachta.

3. Comhairleoirí eacnamaíocha á n-earcú

Chinn an Bord comhairleoirí eacnamaíocha a earcú chun tabhairt faoi athbhreithniú ar an gcéad bhabhta de cheaduithe a glacadh faoin iarBhord. Thosaigh an próiseas earcaíochta sa bhliain 2006 agus ba é an toradh a bhí air gur ceapadh Goodbody Economic Consultants i Márta na bliana 2007.

4. Clár na nIniúchtaí

Lean an Bord clár iniúchtaí chun a chinntiú go rabhthas ag comhlíonadh Plean agus rialachas cuí an Bhoird. Bhí Coiste Iniúchta an Bhoird, ach go háirithe, gníomhach agus chuaigh Deloitte & Touche, a cuireann feidhm iniúchta inmheánaigh ar fáil don Bhord, i mbun na n-iniúchtaí seo a leanas:

- i) I nDeireadh Fómhair 2006 chuir Deloitte & Touche isteach athbhreithniú ar iniúchadh a rinneadh ar íocaíochtaí deontas a bhí próiseáilte ag Pobal as Ciste na gCuntas Díomhaoin sa tréimhse 1 Deireadh Fómhair 2005 agus 30 Meán Fómhair 2006.
- ii) I nDeireadh Fómhair 2006 chuir Deloitte & Touche isteach tuairisc cothrom le dáta ar an bpróiseas monatóireachta agus tuairiscithe a bhí ar bun ag Pobal.

Torthaí dearfacha a tháinig as an dá iniúchadh a rinne Deloitte & Touche agus ba mhionfhadhbanna a bhain leis an líon beag réimsí a luadh agus táthar tar éis tabhairt fúthu sin.

Thuairiscigh Coiste Iniúchta an Bhoird chuig an mBord go rialta le linn 2006 i ndáil le gníomhaíocht leanúnach iniúchta. Tá an Cathaoirleach agus an Bord dóchasach, cé nach féidir ráthaíocht chinnte a thabhairt i gcoinne earráid ábhartha, go bhfuil na córais atá curtha i bhfeidhm téagartha agus go gcinnteoidh siad go gcaithfear an t-airgead a eisíoctar as an gCiste de réir na sainchoinníollacha a bhaineann le gach eisíocaíocht.

4. Rialachas Corparáideach agus Riaracháin an Bhoird

Tá Cód Iompair Ghnó, a bhaineann go sonrath lena riachtanais féin, aontaithe agus glactha leis ag an mBord agus tá an Cód de réir na gceanglas a leagtar amach sa Chód Cleachtais um Rialú Comhlachtaí Stáit. Leagtar amach múnla scothchleachtais de struchtúir rialachais chorparáidigh don Bhord sa chód, lena n-áirítear ceanglais dhlíthiúla, freagrachta agus ceanglais fhoirmiúla bhainistíochta eile atá sa reachtaíocht a chomhlíonadh.

Tugann rúnaireacht bheag ar a bhfuil ball amháin d'fhoireann na Roinne Gnóthaí Pobail, Tuaithe agus Gaeltachta uirthi tacaíocht don Bhord. Ghlac an Bord le seirbhísí comhairleora sheachtraigh (An tUas. David Lovegrove, iar-Rúnaí Forfás) i bhFeabhra na bliana 2006 chun tacú le hobair an Bhoird. Áirítear lena ról comhairle a chur ar an mBord i ndáil le hullmhú agus le forfheidhmiú an Phlean Eisíocaíochta agus struchtúir chúil rialachais a chur i bhfeidhm don Bhord agus don Rúnaireacht. Áiríodh na feidhmeanna seo a leanas ar obair na Rúnaireachta go dáta:

- rúnaireacht éifeachtach a sholáthar ag cruinnithe an Bhoird;
- cuidiú a thabhairt don Bhord le hullmhú an Phlean Eisíocaíochta;

:
Aguisín A

Caiteachas an Bhoird 2006

1. Táillí an Bhoird (ÍMAT san áireamh):

Fo-iomlán táillí an Bhoird: €75,110

2. Speansais an Bhoird:

Fo-iomlán speansais an Bhoird (taisteal agus liúntais chothaithe): €4,836.46

3. Costais an Bhoird:

Táillí Comhairliúcháin - Lovegrove & Associates	Táillí: €18,926.82, + CBL: €5031.18 Iomlán: €23,958.00
Táillí Aistriúcháin	€2,232.93
Deloitte & Touche –costais iniúchta inmheánaigh	€12,100
Costais chruinnithe an Bhoird - lónadóireacht	€997.80
Costais árachais	€18,500
Clódóireacht, Dearadh ar Thuarascáil Bhliantúil:	€8,717
Fógraíocht	€9,916
Costais Dhlíthiúla	€1,536.56

Costais Iomlána an Bhoird: €77,958.67

Táillí an Bhoird: €75,110.00

Speansais an Bhoird € 4,836.46

Costais an Bhoird: €77,958.67

Mór-iomlán

€157,905.13

Aguisín B

Comhaltaí Boird an Bhoird um Chuntais Dhíomhaoine 2006

Cheap Éamon Ó Cuív TD, An tAire Gnóthaí Pobail, Tuaithe agus Gaeltachta na Comhaltaí seo a leanas (Deichniúr Comhalta agus Cathaoirleach amháin) ar an mBord ar an 4ú Eanáir 2006. Michael Morley (Cathaoirleach), Áine Hyland, Dónal Ó Síocháin, Enda Twomey, Frank Ward, Gerry Ryan, Séamus Thompson, Kate Feely, Rosaleen Glackin, David Martin agus Noel McPartland.

Comhaltaí de Bhord Eisíocaíochtaí Chiste na gCuntas Díomhaoin ab ea iad Áine Hyland, Dónal Ó Síocháin, Enda Twomey agus Frank Ward, Gerry Ryan agus Séamus Thompson. Athcheapadh Gerry Ryan agus Séamus Thompson ar an iarBhord chun a ndara téarma a chur díobh agus chiallaigh sin nach raibh siad i dteideal a bheith athcheaptha nuair a chuaigh a ndara téarma in éag i mí an Mheithimh 2006.

Ceapadh Michael Morley mar Chathaoirleach i mí Eanáir 2006 ar feadh tréimhse 5 bliana. Ceapadh Kate Feely, Rosaleen Glackin, David Martin agus Noel McPartland mar chomhaltaí Boird in Eanáir 2006 ar feadh tréimhse trí bliana. Cheap an tAire Ó Cuív Marian Hackett i nDeireadh Fómhair 2006 ar feadh tréimhse 3 bliana.

Liosta Comhaltaí Boird

Michael Morley - Cathaoirleach

Kate Feely

Rosaleen Glackin

Marian Hackett (ó Dheireadh Fómhair 2006)

Áine Hyland

David Martin

Noel McPartland

Dónal Ó Síocháin (d'imigh a théarma in éag i mí an Mheithimh 2006)

Gerry Ryan (d'imigh a théarma in éag i mí an Mheithimh 2006)

Séamus Thompson

Enda Twomey

Frank Ward

Taifead Tinrimh ag Cruinnithe an Bhoird 2006:

Tionóladh 10 gcrúinníú Boird sa bhliain 2006. Seo thíos taifead tinrimh chomhaltaí an Bhoird:

Líon na gcrúinnithe a ndearnadh freastal orthu
(An líon a rabhthas i dteideal freastal orthu idir lúibíní)

Michael Morley	10 (10)
Kate Feely	9 (10)
Rosaleen Glackin	6 (10)
Marian Hackett	2 (2)
Áine Hyland	7 (10)
David Martin	7 (10)
Noel McPartland	5 (10)
Dónal Ó Síocháin	6 (10)
Gerry Ryan	4 (5)
Séamus Thompson	2 (5)
Enda Twomey	9 (10)
Frank Ward	7 (10)

Ní raibh córam i gceann amháin de na cruinnithe. Tionóladh an cruinníú sin ar an 31^ú Lúnasa 2006. Phléigh na Comhaltaí a bhí i láthair an pointe faoi gan córam a bheith ann arna shainmhíniú sa reachtaíocht. Aontaíodh, áfach, gur cheart dul ar aghaidh leis an gcrúinníú agus daingníodh na cinntí a glacadh ag an gcrúinníú ag an gcéad chruinníú iomlán eile de chuid an Bhoird ina raibh córam.

Comhdhéanamh an Choiste Iniúchta agus Taifead Tinrimh ag Cruinnithe sa bhliain 2006:

Cuireann an Coiste Iniúchta athbhreithniú neamhspleách agus feidhm chomhairleach ar fáil i gcomhar leis an mBord i ndáil le leorgacht agus éifeachtacht na rialuithe agus na gcóras agus lena n-oibríocht. Tionóladh an Coiste seo faoi dhó sa bhliain 2006.

Líon na gcruinnithe a ndearnadh freastal orthu
(An líon a rabhthas i dteideal freastal orthu idir

lúibíní)

An tUasal David Martin (Cathaoirleach)	2(2)
An tUasal Dónal Ó Síocháin	1(2)
An tUasal Séamus Thompson	0(0)
An tUasal Frank Ward	1(2)

Aguisín C:

Liosta de Sholáthraithe Seirbhíse sa bhliain 2006

Aistriú/Tarmligean ó Bhord Eisíocaíochta na gCuntas Díomhaoine chuig an Bord Um Chuntais Dhíomhaoine

Forálann Alt 14 den Acht um Chuntais Dhíomhaoine (Leasú) 2005 go gcaomhnófar conarthaí a rinneadh idir an t-iarBhord (Bord Eisíocaíochta na gCuntas Díomhaoine) agus grúpaí/eagraíochtaí/cuideachtaí. Chuige sin thug an Bord faoi deara go raibh conradh ag na soláthraithe seirbhíse seo a leanas leis an mBord.

- **Comhairleoirí Dlí**

Cheap an t-iarBhord Kennedy McGonigle Ballagh Solicitors mar chomhairleoirí dlí agus fuair an Bord faomhadh ón Aire don cheapachán. Leanann Kennedy McGonigle Ballagh Solicitors ag obair faoi chonradh leis an mBord um Chuntais Dhíomhaoine.

- **Iniúcháirí Inmheánacha**

Cheadaigh an t-iarBhord ceapachán Deloitte and Touche, Cuntasóirí Cairte, tar éis próiseas tairisceana sa bhliain 2003 chun feidhm iniúchta inmheánaigh a sholáthar don Bhord agus fuarthas faomhadh ón Aire don cheapachán. Leanann Deloitte & Touche ag obair faoi chonradh leis an mBord um Chuntais Dhíomhaoine. Tá an conradh seo faoi réir ag athbhreithnithe bliantúla agus an rogha ann seirbhísí Deloitte and Touche a chur de lámh ach fógra míosa a thabhairt i scríbhinn.

- **Árachas**

Leanadh ag baint úsáide as seirbhísí Marsh Ireland Ltd. (bróicéirí árachais) chun bainistíocht a dhéanamh ar chúrsaí árachais an Bhoird. Leanadh ag baint úsáide as seirbhísí Marsh Ireland Ltd. tar éis próiseas tairisceana sa bhliain 2003. Fuarthas faomhadh ón Aire don cheapachán seo agus lean Marsh Ireland Teo. ag soláthar na seirbhíse seo don Bhord.

I dteannta na soláthraithe seirbhíse a luaitear thuas a raibh a seirbhísí in úsáid ag an iarBhord i dtús báire lean an Bord sa bhliain 2006 ag baint úsáide as na seirbhísí a chuireann na heagraíochtaí seo a leanas ar fáil:

- **Comhairleoir an Bhoird**

Cheadaigh an Bord i bhFeabhra na bliana 2006 ceapachán de dhuine/soláthraí ag a mbeadh na cáilíochtaí cuí chun seirbhís chomhairleach a sholáthar don Bhord chun cuidiú leis a fheidhmeanna reachtúla a chur i gcrích. Bronnadh an conradh chun na seirbhísí comhairleacha a sholáthar don Bhord ar David Lovegrove de chuid Lovegrove & Associates tar éis próiseas tairisceana. Fuarthas faomhadh ón Aire don cheapachán seo.

- **Céannacht an Bhoird**

Fostaíodh Comhairleoirí Red Dog Design sa bhliain 2006 chun lógó agus ceann litreach a shaincheapadh don Bhord.

- **Clódóireacht**

Sa bhliain 2006 d'fhostaigh an Bord Fodhla Printing chun Tuarascáil Bhliantúil Bhord Eisiócaíochta Chiste na gCuntas Díomhaoin a dhearadh agus a chur i gcló agus chun Plean Eisiócaíochta an Bhoird um Chuntais Dhíomhaoine a dhearadh agus a chur i gcló.

- **Fógraíocht**

I mí Lúnasa na bliana 2006 d'fhostaigh an Bord Brindley Advertising Limited chun fógra a chur i 4 nuachtán náisiúnta. Glaoch ar léiriú spéise ó chuideachtaí chun dul i mbun athbhreithnithe agus measúnaithe don Bhord um Chuntais Dhíomhaoine a bhí san fhógra sin.

Aguisín D:

Dearbhuithe an Chathaoirligh:

1. Dearbhaím gur cuireadh na nósanna imeachta cuí maidir le tuairisciú airgeadais, iniúchadh inmheánach agus soláthar i bhfeidhm. Tá Coiste Iniúchta, ar a bhfuil triúr Comhalta Boird, bunaithe ag an mBord agus tá Téarmaí Tagartha atá faofa ag an mBord, ag an gCoiste. Tionóltar an Coiste Iniúchta go rialta agus tá clár iniúchtaí glactha aige atá á fhorfheidhmiú ag na hiniúcháirí inmheánacha.

Ceanglaím leis seo ráiteas (Aguisín E) de chóras rialaithe inmheánaigh airgeadais an Bhoird san fhormaid atá leagtha amach in Aguisín E den Chód Cleachtais ar Rialú Comhlachtaí Stáit.

2. Dearbhaím, le linn na tréimhse idir lámha sa tuarascáil seo, nár bhunaigh an Bord fochuideachtaí ná comhfhiontair ar bith nó nach bhfuair sé scaireanna ar bith nó nach ndeachaigh sé i mbun gníomhaíochtaí ar bith den sórt sin
3. Dearbhaím, le linn na tréimhse idir lámha sa tuarascáil seo, nach bhfuair an Bord sócmhainní ar bith de chineál tráchtála agus nár chuir an Bord sócmhainní ar bith de lámh.
4. Dearbhaím gur cloíodh leis an gCód Iompair Ghnó a d'fhorbair agus a ghlac an Bord.
5. Deimhním go bhfuil treoirlínte an Rialtais maidir le táillí a íoc le Comhaltaí Boird Stáit, á gcomhlíonadh. Chuige sin tá íocaíocht na dtáillí le Comhaltaí an Bhoird de réir an cheadaithe a bhí faighte ón Aire Airgeadais.
6. Deimhním, seachas an measúnú ar mholtaí Pobal maidir le ceaduithe atá tugtha cheana féin a leithdháileadh arís nó a chur as feidhm, nach ndeachaigh an Bord i mbun measúnú ná bainistíochta ar thograí caiteachais chaipitil ar bith le linn na tréimhse atá idir lámha sa tuarascáil seo dá chuid féin.
7. Deimhním gur chomhlíon an Bord a dhualgais faoi na dlíthe cánach.
8. Deimhním go bhfuil an Cód Cleachtais um Rialú Comhlachtaí Stáit glactha ag an mBord agus go bhfuiltear á chomhlíonadh go hiomlán de réir mar is cuí i gcás Bord Stáit neamhthráchtála.

Michael Morley
Cathaoirleach
29 Meitheamh 2007

Aguisín E:

Ráiteas an Chathaoirligh maidir leis an gCóras Rialaithe Inmheánaigh Airgeadais

Is é/í Cathaoirleach an Bhoird um Chuntais Dhíomhaoine atá freagrach as a chinntiú go bhfeidhmíonn córas rialaithe inmheánaigh airgeadais an Bhoird de réir na gcaighdeán gairmiúil is airde. Bunaíodh Coiste Iniúchta, ar a bhfuil triúr comhalta den Bhord, agus tá sé freagrach as maoirseacht a dhéanamh ar fheidhm iniúchta inmheánaigh an Bhoird. Tá feidhmeanna, dualgais agus téarmaí tagartha an Choiste Iniúchta faofa ag an mBord.

Níl na hacmhainní riaracháin ag an mBord é féin chun an fheidhm iniúchta inmheánaigh a fheidhmiú agus dá bhrí sin ghlac sé saineolas seachtrach chun tabhairt faoin ról sin ar a shon. Ceapadh Deloitte & Touche mar iniúchóirí inmheánacha don iarBhord agus lean an Bord reatha air ag úsáid a gcuid seirbhísí. Tuairiscíonn na hiniúchóirí inmheánacha, trí bhíthin Chathaoirleach an Choiste sin, go díreach chuig an gCoiste Iniúchta.

Tá Plean Straitéiseach Iniúchta Inmheánaigh ullmhaithe ag Deloitte agus sonraítear ann an ghníomhaíocht iniúchta atá beartaithe a ghlacadh. Rinne an Coiste Iniúchta athbhreithniú ar an bplean seo agus d'fhaomh siad é. Lean Deloitte le linn 2006 ag cur an phlean seo i bhfeidhm. Ós rud é go bhfuil laghdú tagtha ar fhreagrachtaí an Bhoird tá réim an chláir iniúchta laghdaithe, áfach.

Nuair a bhíonn na hiniúchóirí inmheánacha i mbun oibre tástáiltear réimsí sonracha atá clúdaithe faoi chairt an Choiste Iniúchta chun a chinntiú go mbíonn an Bord ag comhlíonadh na gceanglas go léir. Tá athbhreithniú déanta ag na hiniúchóirí inmheánacha chomh maith ar na córais atá i bhfeidhm in Pobal i ndáil lena ról chun an clár maoinithe a riar.

Is beag an baol go ndéanfaí drochbhainistíocht ar chúrsaí airgeadais ó tharla an sainordú atá ag an mBord, mar atá leagtha amach sa reachtaíocht, a bhaineann le polasaithe a leagan amach agus monatóireacht a dhéanamh ar pholasaithe agus gan feidhmeanna feidhmiúcháin ar bith a bheith i gceist. Tá nósanna imeachta soláthair na Roinne Gnóthaí Pobail, Tuaithe agus Gaeltachta glactha ag an mBord. Ina theannta sin is í Rannóg Cuntasaíochta na Roinne a phróiseálann na híocaíochtaí go léir a bhaineann le gníomhaíochtaí an Bhoird agus ní mór dóibh cloí leis na nósanna imeachta go léir a bhaineann leis an Roinn.

Thuairiscigh an Coiste Iniúchta, le linn na bliana 2006, chuig an mBord go rialta i ndáil le gníomhaíocht leanúnach iniúchta. Tá an Cathaoirleach agus an Bord dóchasach, cé nach féidir ráthaíocht chinnte a thabhairt i gcoinne earráid ábhartha, go bhfuil na córais atá curtha i bhfeidhm téagartha agus go gcinnteoidh siad go gcaithfear an t-airgead a eisíoctar as an gCiste de réir na sainchoinníollacha a bhaineann le gach eisíocaíocht.